

# Miocardiopatía hipertrófica familiar y muerte de súbito: nuevas ferramientes pal estudiu xenómico

Por Xosé A. Suárez Puente

Departamento de Bioquímica y Biología Molecular

Instituto Universitario d'Oncoloxía (IUOPA)

Universidá d'Uviéu

nature.com ▶ Publications A-Z index ▶ Browse by subject

Search | Go | Advanced search

ADVERTISEMENT THE REPRODUCIBILITY CRISIS  
New content added monthly  
Access the Special online

nature SPECIAL

ADVERTISEMENT

nature COMMUNICATIONS

Home About the journal Authors and referees Browse archive Search

ARCHIVE

Browse by: Date Article type Subject terms


OCTOBER 2014

+ 2015 2014 + 2013 + 2012 + 2011 + 2010


Jan | Feb | Mar | Apr | May | Jun | Jul | Aug | Sep | Oct | Nov | Dec

October 2014: 31 | 30 | 29 | 28 | 27 | 24 | 22 | 21 | 20 | 17 | 16 | 15 | 14 | 13 |  
10 | 09 | 08 | 07 | 06 | 03 | 01

31 October 2014


 ARTICLE  
On the absence of intrahelical DNA dynamics on the  $\mu$ s to ms timescale **OPEN**  
Rodrigo Galindo-Murillo, Daniel R. Roe, Thomas E. Cheatham III  
Biological Sciences | Biochemistry | Bioinformatics  
Abstract | Full Text | PDF (0 kB)

 ARTICLE  
Mutations in filamin C cause a new form of familial hypertrophic cardiomyopathy  
Rafael Valdés-Mas, Ana Gutiérrez-Fernández, Juan Gómez, Eliecer Coto, Aurora Astudillo, Diana A. Puente, Julián R. Reguero, Victoria Álvarez, César Moris, Diego León, María Martín, Xose S. Puente, Carlos López-Otín  
Biological Sciences | Genetics  
Abstract | Full Text | PDF (0 kB) | Supplementary Information

 ARTICLE  
Vesicle-based artificial cells as chemical microreactors with spatially segregated reaction pathways **OPEN**  
Yuval Elani, Robert V. Law, Oscar Ces  
Chemical Sciences | Bioengineering | Biophysics | Chemical biology  
Abstract | Full Text | PDF (0 kB)


## ARRIBA

Índiz del Nature Communications onde, n'ochobre de 2014, diose l'anuncia de les rellaciones ente una mutación nun xen de la proteína muscular filamina C y la miocardiopatía hipertrófica familiar, como s'esplica nesti artículu.



IZQUIERDA

Figura 1. Árbol xenealóxicu de la familia estudiada.



#### ENTAMU

**L**es enfermedaes cardiovasculares representen la causa cimera de muerte nes sociedaes occidentales. Con más de 17 millones de muertes al añu, los infartos de miocardiu o les enfermedaes coronaries caltiénense penriba d'otres malures como'l cáncanu. Ye por esto que, dende hai más de mediu sieglu, munches de les estratexes nacionales de salú tán empobinaes a amenorgar el número de muertes poles enfermedaes del corazón. L'estudiu de les carauterístiques de los pacientes con estos malures fixo posible identificar parámetros clínicos, como

**La miocardiopatía hipertrófica ye una enfermedá xenética, relativamente común, qu'afeuta a 1 de cada 500 personas. Nel añu 1989 identificóse'l primer xen nel que les sos mutaciones causaben esta malura**

presión sanguíneo alto o niveles de colesterol o triglicéridos elevaos, asociaos a estos enfermedaes. Por suerte, muchos d'estos parámetros clínicos puen, al empar, venceyase a zones n'alimentación o nel exerciciu. Esta interrelación ente les causes d'una enfermedá y los vezos de comportamientu ufre una alternativa terapéutica que nun ye mui común nel restu de patologíes. Cambios na dieta y l'actividá puen prevenir claramente'l desendolcu de les enfermedaes

cardiovasculares, ufiertándose como una de les principales estratexes p'amenzorgar el número de muertes causaes por estes enfermedaes.

Sicasí, los factores esternos nun son la principal causa de riesgu pa una proporción de pacientes sinón la presencia de mutaciones xenétiques. Dalgunes d'estes mutaciones son p'aumentar el riesgu de desendolcar estes patologíes a los familiares que porten diches mutaciones. Nestos casos, la conocencia de qué

xen ta mutáu nuna familia ye útil pa facer una xera de conseyu xenéticu y un siguimientu del individuu inda enantes de que tenga síntomes de la enfermedá, asina como pa facer una xera preventiva.

Hai delles enfermedaes cardiovasculares que puen tener un orixe xenéticu, incluyendo la hipercolesterolemia familiar, la hipolipoproteinemía familiar, alteraciones de la presión sanguíneo por causes xenétiques, síndrome de Marfan, defectos nos septos o nos válvules, o la miocardiopatía hipertrófica (Fellin *et al.* 2015; Kathiresan & Srivastava 2012). Esta cabera ye una enfermedá xenética relativamente común –qu'afeuta a 1 de cada 500 personas– y carauterízase por un enanchamiento de la parede muscular del corazón, el miocardiu. L'estudiu de families con esta patoloxía permitió identificar, nel añu 1989, el primer xen nel que les sos mutaciones causaben esta enfermedá (Seidman & Seidman 2012). Viose asina que mutaciones nel xen que codifica la cadena pesada de la beta-miosina cardiaca (*MYH7*) asociábense a esta enfermedá.

Dende hai 25 años que se descubrié'l primer xen causante d'esta enfermedá (Geisterfer-Lowrance *et al.* 1990), l'estudiu de más families con miocardiopatía hipertrófica permitió la identificación de mutaciones en nuevos xenes, inclui-

yendo *TNNI2*, *TPM1*, *TNNI3* o *MYL2*, ente otros. La mayor parte d'estos xenes codifiquen proteínes que formen el sarcómeru muscular, poro, mutaciones nestos xenes dan nun funcionamiento anormal d'esta estructura, contribuyendo al desendolcu d'esta patoloxía. Sicasí, a pesar del avance que supunxo la identificación de mutaciones nestos xenes pal siguimientu d'esta enfermedá, les mutaciones nestos namái espliquen un 60% de los casos de miocardiopatía hipertrófica familiar, lo que suxer qu'un 40% de les families con esta enfermedá ye pola mor de mutaciones n'otros xenes qu'inda nun se conocen.

Por esta razón, nel trabayu espiblizáu por Valdés-Mas *et al.* (2014), fíxose por estudiar families con miocardiopatía hipertrófica y que nun tuvieron mutaciones nos xenes conocíos hasta'l momentu.

#### Suxetos d'estudiu

El casu índiz yera una paciente de 53 años (*CAR2* \_ III-1) a la que diagnosticaren, a los 20 años, miocardiopatía hipertrófica consistente colos criterios establecíos, incluyendo electrocardiografía qu'amosaba una hipertrofia del ventrículo esquierdu y ecocardiografía qu'amosaba un septu hipertróficu de 27 mm. El casu yera consistente con un casu de miocardiopatía

hipertrófica familiar pola presencia de más miembros de la familia con esta patoloxía. La figura 1 amuesa l'árbol xenéticu de la familia. La ma finare de muerte de sópitu a los 34 años y la güela y tía güela tamién finaren por causes cardiaques a los 62 y 55 años, respetivamente. Dos parientes más (*CAR2* \_ II-7 Y *CAR2* \_ II-9) (Fig. 1) tamién se diagnosticaren de miocardiopatía hipertrófica a los 45 y 82 años, respetivamente. L'análisis de los xenes conocíos de miocardiopatía hipertrófica familiar, incluyendo *MYH7*, *MYBPC3*, *TNNI3*, *TPM1*, *ACTC1*, *TNNC1*, *MYL2* y *MYL3*, nun foren a detectar mutaciones nesti paciente, susiriendo que la herencia d'esta enfermedá na familia yera por cuenta de mutaciones n'otru xen.

**Identificada una variante nel xen *FLNC* que provoca'l cambéu p.A1539T, l'ADN de cuatro de los miembros con miocardiopatía hipertrófica de los nueve vivos de la familia estudiada tenía esa variante p.A1539T**

#### Secuenciación del exoma d'un paciente con miocardiopatía hipertrófica familiar

Col envís d'atopar posibles mutaciones responsables d'esta enfermedá familiar, y aprovechando los recientes avances en teunoxíes de secuenciación masiva d'ADN, procedióse a secuenciar l'exoma del casu índiz. Pa ello, partióse de tres microgramos d'ADN, que se frayaron, y les rexones codificantes atrapáronse per aciu del emplegu de sondes d'ARN biotinilao correspondientes a más de 200.000 exones del xenoma humano. Les llibreríes resultantes secuenciáronse usando la teunoloxía Illumina HiSeq2000, xenerándose más de 80 millones de secuencies, que s'analizaron usando la ferramenta d'ánalisis de xenomes Sidrón (Puente *et al.* 2011). El re-


sultáu aportó la esistencia de cuasi 20.000 variantes con respeuto al xenoma de referencia y nenguna d'elles afeutaba a dalgún de los xenes conocíos que causen miocardiopatía hipertrófica. Col enfotu d'identificar nueves mutaciones que pudieren causar esta enfermedá, peñeráronse toles variantes, desaniciando aquelles variantes comunes que taben presentes en más del 1% de la población acordes cola base de datos dbSNP135 (Sherry *et al.* 2001). D'esta miente, atopáronse 128 variantes xenétiques que nun yeren comunes na población, y qu'afeutaben a la función de les proteínes codificaes polos xenes afeutaos pola mor de la producción de cambeos d'aminoácidu, codones de parada prematuros, cambeos nos sitios d'empalme o cambeos na pauta de llectura. Col envís de peñerar inda más los datos, emplegáronse bases de datos d'expresión xénica pa esbillar aquellos

xenes con una expresión en músculu cardiacu. D'esta miente, identificóse una única variante, nel xen *FLNC*, que codifica la filamina c específica del músculu y que participa na diferenciación de los miocitos, provocando'l cambéu p.A1539T.

Como primer pasu pa establecer si la variante identificada podría representar una nueva mutación causante de miocardiopatía familiar, procedióse a estudiar si dicha variante segregaba cola enfermedá. Pa ello, fíxose l'análisis d'esta variante en tolos miembros disponibles de la familia al traviés de l'amplificación d'esa

#### DERECHA

Figura 2. Estratexa de secuenciación por llotes.



**Tabla 1. Mutaciones identificadas na *FLNC* en families con miocardiopatía hereditaria**

Familia	Variante (hg19)	Cambéu d'aminoácidu	Predicción SIFT	Predicción PolyPhen
176	chr7:128,471,013 G>T	p.E108X	Deletérea	Probablemente dañible
84	chr7:128,475,395 T>C	p.V123A	Deletérea	Probablemente dañible
195	chr7:128,477,710 C>A	p.N290K	Deletérea	Probablemente dañible
2	chr7:128,488,649 G>A	p.A1539T	Deletérea	Probablemente dañible
304	chr7:128,488,649 G>A	p.A1539T	Deletérea	Probablemente dañible
242	chr7:128,493,858 G>A	p.G2151S	Deletérea	Probablemente dañible
125	chr7:128,494,682 C>A	p.H2315N	Deletérea	Benigna
240	chr7:128,496,609 C>T	p.A2430V	Neutral	Probablemente dañible


rexón pola reaición en cadena de la polimerasa (PCR) y secuenciación Sanger darréu. L'análisis del ADN de nueve miembros vivos d'esta familia (Fig. 1) amosó que los cuatro miembros de la familia con miocardiopatía hipertrófica tenían la variante p.A1539T, mientras que cinco miembros non afeutaos nun la tenían, confirmando que la variante segregaba cola enfermedá. Entá, tres individuos más de la familia (I-1, II-1 y II-6), que yeren portadores obligaos de la variante p.A1539T, pero pa los que nun hubiere ADN afayadizo pal análisis, finaren pola mor de causes cardíques y consideráronse afeutaos. L'inxerimientu d'estos portadores obligaos nel análisis amosó qu'había un lligamientu ente la variante de la *FLNC* y la miocardiopatía hipertrófica nesta familia ( $LOD=2.33$ ).

#### Variantes en *FLNC* en families con miocardiopatía hipertrófica

Col oxetivu d'esplorar si otres variantes nel xen que codifica la filamina c podríen tar presentes n'otres families con esta enfermedá, secuenciáronse los 48 exones codificantes del xen *FLNC* nuna esbilla de 92 pacientes con miocardiopatía hipertrófica (19% con segregación familiar, y 81% aparentemente esporádicos), y que nun presentaben mutaciones nos xenes sarcoméricos conocíos. La secuenciación d'esti grupu de pacientes fíxose per mediu d'una estratexa d'amplificación por PCR en lotes, y secuenciación masiva (Fig. 2) (Puente *et al.* 2011). Esti estudi asoleyó seis variantes ensin sentíu nueves y una variante truncante (Tabla 1). En conxuntu, identificáronse ocho variantes únicas en nueve

pacientes de miocardiopatía hipertrófica. La secuenciación de familiares d'estos pacientes permitió identificar 18 individuos más con variantes na *FLNC*. Nenguna d'esas variantes taba presente en 440 individuos de la población española, individuos del proyeutu 1000genomes (Abecasis *et al.* 2010), o nel proyeutu de secuenciación d'exomes (ESP), cola salvedá de la variante p.A2430v, presente en dos alelos de más de 12.000 analizaos. Col envís de determinar si'l númberu de pacientes con mutaciones en *FLNC* identificaos na nuesa serie yera diferente de lo esperao na población xeneral, fíxose una comparanza d'estos resultaos colos datos de la población americana d'ascendencia europea, dientro del proyeutu ESP. D'esti mou, atopamos que 98 individuos d'un total de 4.200 del proyeutu ESP tenían variantes nel xen *FLNC* predichos como dañibles polos programes SIFT y PolyPhen (Kumar *et al.* 2009; Adzhubei *et al.* 2010), incluyendo dalgunos camudamientos de pauta y codones prematuros asitiaos na rexón c-terminal y asemeyaos a los descritos na miopatía miofibrilar (Vorgerd, M. *et al.* 2005). Por contra, nel nuesu análisis de pacientes con miocardiopatía hipertrófica, atopamos 7 pacientes d'un total de 92 con variantes en *FLNC* prediches como dañibles por dambos algoritmos (Prueba Exauta de Fisher  $P=0.0068$ , OR=3.44, 95% CI: 1.31–7.68), lo qu'indica que ye enforma improbable atopar esta distribución de mutaciones al azar.

Inda más, pudo observase qu'había una fuerte correllación ente la presencia d'una variante na *FLNC* y l'estáu clínicu n'ocho de les families analizaes (LOD combináu= 4.1). Asina, de los 16 individuos mayores de 40 años y que tenían una variante na *FLNC*, 14 d'ellos tenían síntomes de miocardiopatía hipertrófica, daqué qu'indica una penetrancia del 87%. La presencia de mutaciones na *FLNC* asociábbase con una



ARRIBA  
*Figura 3. Inmunohistoquímica de filamina c en texíu cardíaco.*

**N'otru estudiu, 5 de 9 families con mutaciones nel xen *FLNC* (un 56%) presentaben casos de muerte de sópitu, en comparanza con namái 23 de 84 casos (27%) ensin variantes nel *FLNC*. La presencia de mutaciones nel *FLNC* asociábbase con una mayor frecuencia d'historia familiar con miocardiopatía hipertrófica (87%)**

mayor frecuencia d'historia familiar de miocardiopatía hipertrófica (55 frente a 17.8%,  $P<0.01$ ). Ye interesante destacar que cinco de les nueve families con mutaciones en *FLNC* (56%) presentaben casos de muerte de sópitu, en comparanza con 23 de 84 casos (27%) ensin variantes en *FLNC* ( $P<0.05$ ).

#### **Les variantes na filamina c afeuten a la estructura del músculu cardíacu**

La filamina c ye una proteína que forma parte del sarcómeru y ye perimportante na diferenciación muscular. Poro, nun ye d'estrañar que mutaciones nel xen que lo codifica puedan provocar malures con afeutación muscular. D'esta miente, dende l'año 2005 conozse que mutaciones en *FLNC* asóciense cola miopatía miofibrilar (MIM 609524) (Vorgerd, M. *et al.* 2005). Sicasí, nengún de los pacientes con *miocardiopatía hipertrófica* d'esti estudiu presentaba síntomes de *miopatía miofibrilar*, incluyendo nueve pacientes de más de 44 años, que ye la edá media a la qu'apaecen los síntomes pa la mutación más frecuente en *FLNC* (p.w2710x). Igualmente, l'estudiu de biopsies musculares de dos d'estos pacientes con mutaciones en *FLNC* (p.A1539T y p.H2315N) amosaron una estructura normal del sarcómeru nel músculu esqueléticu, lo que contrasta colos estudios histolóxicos del músculu cardíacu. Nesti sen, analizóse'l corazón de dos pacientes con mutaciones en *FLNC* y que fueren tresplantaos. Esti análisis confirmó la presencia d'anormalidaes nel sarcómeru como desordenamiento miofibrilar, agregaos sarcoméricos y fibrosis, que nun s'observaren en corazones control de pacientes con miocardiopatía hipertrófica ensin mutaciones en *FLNC* o d'un donante sanu (Fig. 3).

**Análisis funcional de les mutaciones en *FLNC*** La filamina C ye una proteína grande, constituyida por más de 2.725 aminoácidos. Una de les carauterístiques de toles mutaciones identificaes na filamina c ye qu'afeutaben a restos que se conservaren na evolución perfeutamente, dende pexes hasta humanos (Fig. 4), suxiriendo que se traten de restos importantes pa la función d'esta proteína. D'otra miente, la distribución de les mutaciones nun yera al azar, sinón que la mayor parte de les mutaciones agrúpense nel cabu N-

terminal (dominiu de xuntura a actina y primer repetición) y nel cabu c-terminal (cuatro caberes repeticiones). Toos estos datos faen pensar que toles variantes atopaes na *FLNC* en pacientes con miocardiopatía hipertrófica podríen menguar la función d'esta proteína sarcomérica.

Col envís d'estudiar esta posibilidá, construyeronse vectores d'espresión col CADN de la filamina c y, per mediu de mutaxénesis dirixida, xeneráronse clones coles mutaciones identificaes nos pacientes de miocardiopatía hipertró-



fica. La introducción d'estes construcciones en mioblastos cardiacos d'aguarón (*H9c2*) per aciu de nucleofección, fixo posible demostrar, tanto per mediu d'análisis Western como al traviés de microscopía confocal, que mientras que la introducción de filamina mutante provocaba la formación d'agregaos insolubles en mioblastos cardiacos, la introducción de filamina normal nun formaba estos agregaos (Fig. 5).

#### ABAXO IZQUIERDA

Figura 4. Esquema y conservación de la filamina c.

#### ABAXO DERECHA

Figura 5. Expresión de filamina c mutante y análisis en cardiomiositos per aciu de microscopía confocal.



## CONCLUSIONES

En conxuntu, los datos derivaos d'esti trabayu demuestren que mutaciones nel xen que codifica la filamina c (*FLNC*) asóciense a miocardiopatía hipertrófica familiar y muerte de sópitu. Toles mutaciones atopaes nesti estudiu afeuten a restos que tán perfeutamente conservaos a lo llargo la evolución, y l'estudiu de la herencia n'ochu families demostró qu'estes mutaciones siempre segreguen cola enfermedá.

Per aciu de la complementación de los estudios xenéticos con estudios funcionales con filamina c mutao en célules cardiaques confirmóse qu'estes formes mutantes son menos estables que la filamina normal, y tienden a precipitar y formar agregaos insolubles nes célules. Estos resultaos, derivaos d'estudios en cultivos celulares *in vitro*, tan d'alcuerdu coles observaciones feches al estudiar el texú cardiaco de pacientes con

estes mutaciones na filamina c, polo que paez abondo probable qu'estes mutaciones contribuyan al desendolcu de la miocardiopatía cardiaca.

En conclusión, estos estudios amuesen la potencia de les nuevas téuniques de secuenciación xenómica pa la identificación de xenes responsables d'enfermedaes hereditaries, y apurren una ferramienta valorable pal diagnósticu precoz y el mejor siguimientu d'estos pacientes.

---

## Lleendes de Figures

### Figura 1. Árbol xenealóxicu de la familia estudiada.

a), El casu índiz con miocardiopatía hipertrófica, y a la que se-y secuenciara l'exoma, ta señalau con una flecha. b) Electroferograma de la rexón d'interés onde s'amuesa la presencia n'heterozigosis d'un cambéu *g>a*, que provoca la mutación *flnc p.a1539t*.

### Figura 2. Extratexa de secuenciación por llotes.

Diagrama que reflexa'l fluxu de trabayu siguiu pa la identificación de variantes en xenes per aciu del emplegu de llotes d'*ADN* d'hasta 100 pacientes distintos.

### Figura 3. Inmunohistoquímica de filamina c en texú cardiaco.


Analís de la distribución de filamina c per aciu d'inmunohistoquímica en texú cardiaco d'un paciente de miocardiopatía hipertrófica con mutación na *FLNC*.

### Figura 4. Esquema y conservación de la filamina c.

Esquema de la organización estructural de la filamina c (abaxo) y llocalización de les mutaciones identificaes en pacientes con miocardiopatía hipertrófica, al igual qu'alliniamientu múltiple con distintes especies de vertebraos amosando l'altu grau de conservación evolutivu de dichos restos.

### Figura 5. Espresión de filamina C mutante y análisis en cardiomiositos per aciu de microscopía confocal.

Col envís d'estudiar l'efeutu de les mutaciones en *flnc* afayaes en pacientes con miocardiopatía hipertrófica familiar, xeneráronse per mediu de mutaxénesis dirixida clones de cadn con estes mutaciones. La introducción d'estes construcciones y la so expresión en cardiomiositos fai posible visualizar l'efeutu d'estes mutaciones sobre la función de la proteína. La figura amuesa una imaxe representativa d'una célula expresando *flnc* cola mutación *p.V123a* (esquierda) o *flnc* control (derecha). En verde puen vese la formación d'agregaos de filamina C na célula qu'espresa la construcción mutada *p.V123a*, mientres que la célula cola construcción control tien una distribución más espardida per tol citoplasma. En colorao amuésase la tinción de les fibres d'actina con faloidina, y el noyu celular pue vese n'azul (dapi).



### References bibliográfiques

- ABECASIS, G. R. ET AL. (2010).- A map of human genome variation from population-scale sequencing. *Nature* 467: 1061-1073.
- ADZHUBEI, I. A. ET AL. (2010) A method and server for predicting damaging missense mutations. *Nat Methods* 7: 248-249.
- FELLIN, R., ARCA, M., ZULIANI, G., CALANDRA, S. & BERTOLINI, S.(2015).- The history of Autosomal Recessive Hypercholesterolemia (ARH). From clinical observations to gene identification. *Gene* 555: 23-32.
- GEISTERER-LOWRANCE, A. A. ET AL.(1990).- A molecular basis for familial hypertrophic cardiomyopathy: a beta cardiac myosin heavy chain gene missense mutation. *Cell* 62: 999-1006.
- KATHIRESAN, S. & D.SRIVASTAVA (2012).- Genetics of human cardiovascular disease. *Cell* 148: 1242-1257.
- KUMAR, P., HENIKOFF, S. & P. C. Ng (2009).- Predicting the effects of coding non-synonymous variants on protein function using the SIFT algorithm. *Nat Protoc* 4: 1073-1081.
- PUENTE, X. S. ET AL. (2011).- Whole-genome sequencing identifies recurrent mutations in chronic lymphocytic leukaemia. *Nature* 475: 101-105 .
- SEIDMAN, C. E. & J.G. SEIDMAN (2011).- Identifying sarcomere gene mutations in hypertrophic cardiomyopathy: a personal history. *Circ Res* 108: 743-750.
- SHERRY, S. T. ET AL. (2001).- dbSNP: the NCBI database of genetic variation. *Nucleic Acids Res* 29: 308-311.
- VALDES-MAS, R. ET AL. (2014).- Mutations in filamin c cause a new form of familial hypertrophic cardiomyopathy. *Nat Commun* 5: 5326.
- VORGERD, M. ET AL.(2005).- A mutation in the dimerization domain of filamin c causes a novel type of autosomal dominant myofibrillar myopathy. *Am J Hum Genet* 77: 297-304.